

# SANTIAGO REMBICUACHIA

## SANTIAGO

---

### Mahenduhasa

**1** <sup>1</sup>Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

### Mbahecuasa ou vahe Tūpa sui

<sup>2</sup>Che rivireta, pevihareteñora peico acoi oimese tecoãhasa pëu yepi. <sup>3</sup>Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosã ãgua rese peico. <sup>4</sup>Peicoño ité pe reco ñemosasa pìpe pe reco mohivi tuprì catu ãgua. Evocoyase nipane iri chira mbahe Tūpa suindar pëu.

<sup>5</sup>Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatêhiêhisa pìpe iyavei ombahe mboasiêhisa pìpe avei. <sup>6</sup>Iyacatu rumo evocoi ava oporandura Tūpa upe sese oyeroyá pìpe, ndahei chira opihañemoñeta rerova-rova tēisa pìpe inungar acoi ivitu i ombohitu-hitu tēi vahe. <sup>7</sup>Acoi êgüe ehi-ehi tēi vahe ava ndoipisii chira mbahe yande Yar sui yuvireco. <sup>8</sup>Esepia, ñepeï ari ipihañemoñeta ñepeï mbahe rese, ambuae ari ambuae rese. Ndoymoviracuai güeco tuprì ãgua rese yuvireco.

<sup>9</sup>Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese. <sup>10</sup>Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri êgüe ehi raimi tēi vahe yuvireco. <sup>11</sup>Evocoyase acoi ari

osêse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Ēgüe ehi aveira ava mbahe yar; omanora oporaviquisa sui.

### **Tecoãhasa, poroãtoisa resendar**

<sup>12</sup>Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirêhi vahe Tüpa ombou vahe guaisupar upe. <sup>13</sup>Acoi ava oyanduse poroãtoisa oyeupe mbahe tēi apo āgua, “Tüpa revo ěgüe ehi cheu” ndehi chira. Esepia niha, Tüpa ātoisar ndipoi eté mbahe tēi oyapo uca vaherã chupe. Iyavei ahe noñatoi avei mbahe tēi apo āgua ava. <sup>14</sup>Co rumo ava opihañemoñeta rai upe oñeatoi uca mbahe tēi apo āgua yepi. <sup>15</sup>Güemimbotarai pipe evocoiyase oyapo angaipa. Ipare angaipa apo pipe sui ou manosa chupe.

<sup>16</sup>Che rivireta, che rembiaisu, peyembopai rene. <sup>17</sup>Esepia, opacatu mbahe aviye vahe ahe Tüpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoci. Esepia, sembiapo oñecuñaro vahe. <sup>18</sup>Ahe rumo ombou ité tecovesa yandeu co ñehesa supi eté vahe pipe ‘toyuvirecoci inungar yipindar mbahe miti ha seropovêhepri cheu opacatu che rembiapo sui’ ohesave yandeu.

### **Tüpa rese yande pïhañemoñetasa supi tupri vahe**

<sup>19</sup>Iyavei che rivireta, che rembiaisu, peyemomahenduha co che ñehe rese: peyapisaca tupri vaira ambuae ava ñehe rese, mbegüe rupi rumo peñehera chupe iyavei ndapembahemboasi voi tēi chiaveira. <sup>20</sup>Esepia, yambahemboasi voi tēise, ndayayapoi Tüpa remimbotar. <sup>21</sup>Evocoiyase peseya teco raisa, opacatu ambuae oime vahe mbahe naporai vahe pe pãhuve. Co catu pe yemominisave peroya catu vite Tüpa ñehe omoingue vahe pe pïha pipe. Ahe niha vireco pïratasa pe pïsiro āgua.

<sup>22</sup>Pe rumo pemboaviyera co pe mbohe vahe ñehesa; ndahei acoi pesenduño tēira. Esepia, pesenduño tēise, pe ae peyembopara.

<sup>23</sup>Supi eté acoi ava osenduño tēise Tüpa Ñehengagüer, ipare rumo ndoviroyai, ahe inungar acoi ava osepiãño tēi vahe vova yepiasa pipe. <sup>24</sup>Ipare rumo oyepepise ichui, cūriteimi sesaraiño ichui.

<sup>25</sup>Acoi ndasesarai vahe ité rumo güemiendu sui iyavei oyapisaca tupri vahe co mborocuaita maranehi mbahe-mbahe tēi sui yande

rerocua vahe rese iyavei oyemoviracuaño ité vahe oyapo vaherã iporocuaíta, ahe oviharetera opacatu güembiapo tupri rese.

<sup>26</sup> Amove ava, “Che aguata tupri Tüpa rupi” ehi tēi. Ndoicuai rumo oñehe monguiriri ägua. Evocoyase ahe ae oyembopa oico. Sembieroya evocoyase ägüe ehi tēi vahe. <sup>27</sup> Yarecose rumo yande rembieroya icatupri, nimarai vahe yande Ru Tüpa rovai, ahese yaiptiviira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

### Ndayamboyoaviratii chira ava mboeteisa sereco

**2** <sup>1</sup> Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira.

<sup>2-3</sup> Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiquese pe pãhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. <sup>4</sup> Evocoyase ägüe peyese, peyapo mbahe ndoyoyai vahe, naporai vahe pe pãhuve ae iyavei peyeapo ava poravosar nungar peico pe pihañemoñeta raisa pipe.

<sup>5</sup> Che rivireta, che rembiaisu, pesendu aipo ñehesa: Tüpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombehugüer rupi che mborerecuasa oyeupe nara’ oyapave guaisupar upe. <sup>6</sup> Pe rumo seroïrosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. <sup>7</sup> Ahe avei niha oñehe-ñehe tēi seroïrosa pipe yande Yar yaroya vahe rer imboyeroyapri rese yuvireco.

<sup>8</sup> Supi eté yayapo mbahe aviye vahe yamboaviyese mborocuaíta ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. <sup>9</sup> Acoi yayeaisu yoavirati tēise rumo, ahese yayapo angaipa, yayavi mborocuaíta Tüpa rovai. <sup>10</sup> Esepia, acoi ava viroya vahe opacatu mborocuaíta, ipare rumo oime que ñepei nomboaviye tuprii vahe, ahe oyavi opacatu mborocuaíta. <sup>11</sup> Esepia, Tüpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaí chira no” ehi. Yepe acoi ndapeyemboaguasai chira viña, pe poroyuca pipe rumo,

peyavi mborocuaita. <sup>12</sup> Evocoyase peñehe tuprira iyavei peico tupri aveira. Esepia, oporandura yande recocuer rese yande Yar oporocuaita pipe güeru vahe yande reco tupri ägua. <sup>13</sup> Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

**Yamboaviye itera mbahe; ndahei chira yande ñehe tēi**

<sup>14</sup> Che rivireta, çaviyera pñha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura pñha ahe oñepisiro aipo ohe pipe tēi yuvireco? <sup>15</sup> Inungar-ra oimese que yande rivri, anise yande reindri upe ipanera iturucuarã, semihura ari yacatu rupindar viña. <sup>16</sup> Evocoyase que pe aipo peyeñora chupe viña: “Aviye, eso tupri eico. Eyeao eso söhisagüer sui, ecaru tupri” peyera. Ipare rumo ndapemondoise mbahe ipane vahe chupe, çaviyera pñha ava upe aipo yande he tēi viña? <sup>17</sup> Ëgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo yahe tēi yaico.

<sup>18</sup> Aviyeteramo ava pe pãhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoñhi pipe. Evocoyase che amboyecua che yeroyasa oime vahe che rembiapo pipe ndeu” ahera. <sup>19</sup> Nde niha aipo, “Che aicua oime ñepeñi Tüpa” ere. Supi eté aipo ere. Co rumo carugar avei oicua. Ichui osiquiyepave rumo ahe oririi eté yuvireco. <sup>20</sup> iMbia, tapeico eme ndayaracuai vahe! ¿Ereicua vo co nde mbahe apoñhisa nde yeroyasa ëgüe ehi tēi vahe? <sup>21</sup> Esepia, Tüpa oipisi yande ramoi Abraham seco tuprisa pipe oicuavëhese porerecosa nungar guahir Isaac chupe aracahe. <sup>22</sup> Indó, Abraham yeroyasa omboyecua ité güembiapo catupri reseve. Evocoyase ëgüe ehi ahe güembiapo tupri pipe omboaviye tupri oyeroyasa oico aracahe. <sup>23</sup> Ëgüe ehi yaviye icuachiapri aipo ehi vahe: “Abraham viroya ité Tüpa, evocoyase, ‘Co seco catupri vahe’ ehi Tüpa ipisi” ehi. Ahese ava, “Abraham Tüpa mboripar ité” ehi yuvireco chupe.

<sup>24</sup> Indó, Tüpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. <sup>25</sup> Ëgüe ehi tupri avei cuña ndipñhai vahe Rahab upe. Esepia, ahe omoingue ñuvirío ava ivi repiasar imondopri güëta pipe, ipare oñomi imondo

ambuae peri rupi yamotarēhisar sui. Ipipe sui Tūpa oipisi inungarra seco ïvi tupri vahe viña. <sup>26</sup>Ēgüe ehi yande rembiapo catupri ndayamboyecuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoyase omano tēi eté oico.

### Yande ñehe resendar

**3** <sup>1</sup>Che rivireta, yipindar ndapeyeapoi chira setá etepri oporombohe vahe peyepāhuve. Esepia, peicua niha yande oporombohe vahe yaicose, Tūpa oporandu catu itera ambuae ava sui yande porombohe agüer rese yandeu curi. <sup>2</sup>Opacatu yande yayavi setá mbahe rese yepi. Oimese que ava ndoyavii vahe oñehe, ahe ava seco ïvi tupri vahe. Iyavei oicua tupri opacatu güeco rereco tupri āgua. <sup>3</sup>Inungar acoi yamondose cavayu yuru penda sese seroguata āgua. Ahese opacatu cavayu retecuer yaicatu imboyahuva āgua. <sup>4</sup>Inungar tupri avei carite guasu, yepi tuvicha iyavei yepi ivitu omoañi opīratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. <sup>5</sup>Ēgüe ehi avei yande āpecu, yepi chīhimi tēi viña, ipipe rumo yayapo tēi mbahe tuvicha vahe ava upe. Inungar avei que tata chīhimi vahe sui tēi yuvi guasu opa ocai. <sup>6</sup>Ēgüe ehi yande ñehesa tata nungar. Iyavei yande āpecu pipe opacatu mbahe-mbahe tēi yamombehu. ¡Evocoi mbahe-mbahe tēi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tēisa carugar suindar. <sup>7</sup>Ava oicatu opacatu mbahe mimba nimasoi vahe mboaracua āgua, vīrai, mboi iyavei mbahe ipi para guasu pipendar avei no. <sup>8</sup>Ndipoi eté rumo que ava oipoepi vaheṛā oñehe. Yandeu ndiyai eté ipoepi āgua. Yande ñehesa oporoyuca vahe nungar ité yepi, mbahe tēi eté. <sup>9</sup>Co yande āpecu pipe yamboetei yande Yar Tūpa, ipipe avei rumo yamomara ava, ahe ava rumo Tūpa oyapo onungar. <sup>10</sup>Ēgüe ehi eté, yande ñehe pipe yamboetei Tūpa, ipipe avei yaroñro ava. Che rivireta, ndiyai evocoi nungar mbahe yayapo yepi. <sup>11</sup>¿Oicatura pīha osē ñepe i ohē vahe sui sēhe vahe, iro vahe avei viña? <sup>12</sup>¿Ihara pīha higuera ivira rese aceituna viña? ¿Iyavei oicatura pīha uva hi rese oha higo viña no? ¡Aní, ndoicatui eté! Iyavei ndoicatui ñepe i ohē vahe sui osē i, sēhe vahe sēhe asi vahe reseve.

### Mbahecuasa supi eté vahe

13 Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecua tuprisa pipe. 14 Oimese rumo pe pihave pe poroamotarẽhisa mbahe pota raisa pipe, iyavei peyeupe nara tẽi mbahe peseca, ahese ndiyai peyemboviha tupri tẽi ‘che yaracúa vahe aico’ pe yapave. Esepia, peremira tẽira supi eté vahe mbahe rese. 15 Ëgüe ehi eté evocoi nungar aracuasa ndahei Tũpa suindar. Ahe rumo co ivi pipendar tẽi vahe, ava pihañemoñeta sui tẽi osẽ vahe iyavei caruguar suindar tẽi avei. 16 Esepia, poroamotarẽhisa yande mbahe pota raisa pipe yarecose iyavei yaipotase mbahe yandeyeupe nara tẽi, ichui osẽ ñehepoepisa iyavei opacatu mbahe tẽi. 17 Acoi vireco vahe rumo Tũpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparaisuereco vahe, nomboyoaviratii vahe güecocuer. Ahe ipihañemoñetasa ñepei reseve vahe iyavei oyapo tupri vahe mbahe. 18 Iyavei acoi oseca vahe mbahe tupri yepi, oipisi itera opiha pipe teco ñvisa.

### Co ivi pipendar mbahe raisusa

**4** 1 ¿Que sui pĩha ou vavasa iyavei ñehepoepi-episa pe pãhuve? Ahe ou pe mbahe pota raisa sui pereco vahe pe pihañemoñetasa pipe. 2 Pe peipota rai mbahe. Ipape rumo ndapeicatu sereco ãgua. Evocoyase peporoyuca pe mbahe pota raisa pipe. Ndiyai eté rumo pẽu sereco ãgua. Ipipe sui peyeecoãha, pevava avei no. Ndapeyosui eté rumo mbahe pe remimbotar. Esepia, ndapeporandui Tũpa upe. 3 Acoi peporanduse rumo sese, ndapeipisii. Esepia, peporandu rai tẽi, peipota pe yemboviha ãgua rese nara tẽi. 4 Ipe mbia, peyavi vahe pe recocuer! ¿Ndapeicuai vo acoi ava Tũpa cuaparẽhi mboripar tẽi yuvirecoi vahe, ahe Tũpa amotarẽhimbar yuvirecoi? Ëgüe ehi eté acoi oipota vahe co ivi pipendar mbahe-mbahe tẽi pipe güeco ãgua, ahe oyeapo Tũpa amotarẽhimbar. 5 Supi eté Tũpa Ñehengagüer aipo ehi: “Tũpa osaisu güecatẽhisa pipe o Espiritu omondo vahe yande piha pipe” ehi. 6 Ahe rumo yande pãtivii catu oporoaisusa pipe. Esepia, icuachiapri aracahendar pipe aipo ehi: “Tũpa oyamotarẽhi

ava oyecomboivate ai vahe. Oip̄itivii rumo seco mbegüe vahe saiskusave” ehi. <sup>7</sup>Sese pemboyeroa catu Tūpa. Peyemoviracua carugar remimbotar apoēhi āgua. Ahese ahe oyepipira pe sui. <sup>8</sup>Peyemboya Tūpa rese, ahe evocoiyase oyemboyara pe rese. Pe, angaipa viyar, ipeñemoatiro mbahe peyapo vahe sui! Iyavei pemoatiro pe pihañemoñetasa ñuvirío pereco vahe sui! <sup>9</sup>Itatasi p̄eu, tapeyaseho, perorivete iri eme, pemboasi pe angaipa pe yemboviharēhisave! <sup>10</sup>Peñenopiha Yar rovai imboyeroyasa p̄ipe. Ahe evocoiyase pe reco mboivatara.

### Peroïro eme pe mboetasa

<sup>11</sup>Che rivireta, aní chira peñehe mara peyeupe. Acoi oñehe rai vahe iyavei viroïro vahe ambuae Jesús reroyasar, ahe oñehe rai t̄ei aveira mborocuita rese seroïrosave. Ēgüe peyese, evocoiyase seroyaēhisa p̄ipe peyemboivate catura mborocuita sui viña. <sup>12</sup>Oime rumo ñepeño ité ombou vahe mborocuita yandeu iyavei oporandu vahe yande recocuer rese. Ahe güeraño avei oicatu oporop̄iširo iyavei oporomocañi āgua no. Evocoiyase pe, indiyai pe cotindar reroïro āgua p̄eu!

### Ndayaicuai mbahe oime vaheṛā yandeu ayihive

<sup>13</sup>Pesendu pe aipo peye vahe: “Cūritei, anise ayihive yasora que tecuave, anise que tecua guasuve revo. Aheve yaicora ñepe araviter yande poraviqui āgua. Ahese yamogana catura guarepochi” aipo peye vahe. <sup>14</sup>iNdapeicuai rumo mbahe oime vaheṛā p̄eu ayihive! ¿Mara ehi p̄iha yande recocuer? Ahe inungar ïvichi oyecua raimi t̄ei vahe, ipare opaño ocañi. <sup>15</sup>Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi. <sup>16</sup>Pe rumo peñeheño pe yemboivate aisa p̄ipe mbahe pe rembiaporā rese. Opacatu evocoi nungar mbahe rumo naporai. <sup>17</sup>Esepia, acoi oicua vahe mbahe tupri apo āgua, ipare rumo ndoyapoi eté, ahe oyapo angaipa.

### Imbahe eta vahe paraisusa resendar

**5** <sup>1</sup>iPe mbahe yar, pesendu co: peyaseho iyavei perāse! Esepia, peiporarara mbahe t̄ei peico. <sup>2</sup>Opacatu pe mbahe eta ocañi t̄ei vaheṛā. Esepia, pe mbahe pe reco ati vahe opa ituyu. Iyavei

pe turucuar yayi vahe opa avei ohu sasoi. <sup>3</sup>Pe oro, pe guarepochi opa opochi ati-ati no. Ahe niha pe recoãha ãgua, omboyecua vahe mbahe tẽi pẽu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tẽi mbahe pereco ati vahe sereco co ari ipa vahe pipe. <sup>4</sup>Peyapisaca, acoi oipoho vahe mbahe pẽu nara yuvireco, chupe ndapemboepii eté. Sese sãsé tẽi yuvireco. Ahe rumo yande Yar ipirató vahe, ivate catu vahe oicua. <sup>5</sup>Co ivi pipe tẽi pe peyecomoendiyai peico iyavei peyemboviha co ivi pipendar mbahe rese inungar guaca imonguirapri yuca ãgua. Ipipe peyemoingatu pe cañi ãgua. <sup>6</sup>Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pẽu viña, pe rumo peyucaño.

### Ñemosasa iyavei yeroquisa resendar

<sup>7</sup>Che rivireta, peñemosañõ yande Yar yevi iri ãgua rese. Inungar ava omaheti vahe osãro rane güemiti poho ãgua. Esepia, ahe osãro yipindar oqui vahe iyavei ipa oqui vahe mbahe miti aviye ãgua. <sup>8</sup>Pe avei peñemosañõ, peyemonguerẽhi catu. Esepia, cõimi eté yande Yar yevi ãgua cute.

<sup>9</sup>Iyavei che rivireta, peñemoiroi rene peyeupe. Evocoyase Tũpa ndoporandui chira co mbahe rese pẽu. Esepia, mborerrecuar guasu iva pendar oyemoingatu voi ohã yandeu porandu ãgua. <sup>10</sup>Che rivireta, peico catu inungar Tũpa ñehe mombehusar aracahendar yuvirecoi vahe. Ahe oñemosañõ mbahe rasicuer upe yande Yar rer pipe oñehe ãgua yuvireco. <sup>11</sup>Yande rumo yaicua sovasapri ava oñemosa vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparisuereco vahe.

<sup>12</sup>Che rivireta, peyapisaca tupri catu co che ñehe rese. Pe ñehe ãgua ndapeiporui chietera que iva rer iyavei que ambuae mbahe pe ñehe reroya uca ãgua. Iyacatu rumo, “Supi eté” peyese, supiño itera; “Aní” peyese, aní chiño itera Tũpa poronupasa pisiẽhi ãgua.

<sup>13</sup>Aviyeteramo que pe pãhu pendar iparaisura oico; toyerogui. Aviyeteramo oimera que sorivete vahe oico; ahe tosapucaí Tũpa upe. <sup>14</sup>Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco. <sup>15</sup>Acoi oyeroyasa pipe sese yuvireco, imbaheasi vahe evocoyase ocuerara;

yande Yar avei omopuhara. Acoi angaipa virecose, oime aveira ñerosa chupe. <sup>16</sup>Sese pemombehu pe angaipa peyeupe, peyeroqui avei peyese pe yembogüera tupri uca ägua. Ava aviye vahe oyerouise oquerëhisave opacatu güecocuer pipe, ahe iyeroquisa ipĩratá ité. <sup>17</sup>Acoi Tũpa ñehe mombehusar Elías yande nungar avei. Ahe oporandu oyerouisa pipe Tũpa upe, “Toqui eme” ehi. Aipo ehise, ndoquii eté ivi harive mbosapi araviter imombitesa rupi. <sup>18</sup>Ipare oyerouqui iri, ahese oqui iyavei mbahe miti iha iri.

<sup>19</sup>Che rivireta, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe, <sup>20</sup>tapeicua pe acoi viroyevi vahe angaipa viyar secocuerai sui, oipĩsiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.